

遜

學

齋

文

鈔

遜學齋文鈔目錄

卷八

王定甫讀左漫錄序

梅神吟館詩序

俞蔭甫詩集序

項先生詩序

乾州楊氏族譜序

淮陽正氣錄序

丁松生書庫抱殘圖序

瑞安北鄉團練義民表序

雷瀆團練義民表序

湖石團練義民表序

塘後團練義民表序

蔣氏莫如樓時文後序

袁端敏公年譜序

旌表烈婦錄序

介庵文集序

焦尾閣詩序

王梅庵先生遺集序

黃禮部詩序

江南武鄉試錄後序

胡月樵退補齋詩存序

琉球入學見聞錄序

琉球詩錄序

琉球詩課序

林恒軒詩序

李芝農詩序

蕉雪山房詩序

廣濟耆舊集序

永嘉先生時文序

遜學齋文鈔卷八

瑞安孫衣言刊

王定甫讀左漫錄序

予一日夜過定甫定甫出書一卷曰讀左漫錄者祇予其從大帥廣西軍營時讀書劄記之辭也所得僅百餘條而於邱明之意及後世註家之說多有發明然其旨非盡主於說經蓋於兵家勝敗之際尤致意焉而往往多爲挹損之辭予讀之固知其有慨乎言也張耳陳餘用廝養卒以紿燕淮陰侯得李左車西向而坐東向而師之彼其出於奴隸之賤或敗亡係虜之餘而耳餘韓信卒用其言以成大功古之號爲名將善收羣策固如此今一旦藉大臣宰相之重憑國家全勢

辨賊萬里之外其响濡偷活於我掌握之中者屢矣雖如煦
老眊未知所出然以其三軍之眾謀臣猛將列在帷帳必有
智足以慮而勇足以爲者而果其滿盈自賢之私深閉固拒
屹不可撼雖有才如定甫徒令依託文字以自洩其無聊不
平而於天下事卒深曠坐睨莫之能救也此其有慨乎言之
也豈爲過哉豈爲過哉

梅神吟館詩序

今世士大夫不學甚矣而婦人女子乃往往好言學問爲詞章然吾觀周召二南聖人取之以爲詩始而卷耳鵲巢螽斯南山之篇說者皆以爲文王周公之德及其諸侯大夫而家人化焉蓋古者教女師傅保姆之法無異於男子而有家之責者又必以身先之至於婦人女子皆有得於詩書之澤禮義之正匪易言也今士大夫之於學既貿貿然無所循矣而爲其婦女者乃相炫以文辭是豈爲有本者哉余友桂林龍通副之繼室何夫人能爲詩通副以其所爲梅神館詩見視夫人之詩固未離乎婦人女子之詞而頗能劇切事務發明義理異於所謂相炫以文辭者也通副官京師不慕聲利而

以奉母讀書爲事方且求古人之所以立行濟世者而欲自
有諸身則夫人之爲詩其異於世之婦人女子也豈足異哉
豈足異哉

俞蔭甫詩集序

予與蔭甫同年成進士同居京師游如兄弟間而未嘗知其能詩既而蔭甫將奉母出都以所刻詩見示則已卓然成一家言予恨知蔭甫晚又三年蔭甫還京師予方喜其死而蔭甫旋視學河南別予去未久遂罷歸蓋自予知蔭甫之能詩未嘗一日得與之言詩也今年夏予出守安慶以兵阻迂道吳中蔭甫與予相見大喜出所刊二巨編相示則益以數年來所爲詩而前所見去其十三四矣蔭甫爲予言自恨其詩不能如古人予謂詩無貴乎古也予之始爲詩亦嘗斤斤求合於古自唐人以後卽不敢觀旣久而後悔之夫詩莫古於三百篇而商周之頌正變之雅與十五國之各自爲風固不

相似至屈氏而易之以騷至蘇李而易之以五言亦未嘗相
似也漢魏以降詩之無媿於古人者莫如曹子建陶淵明李
杜韓愈氏矣而其詩皆未嘗相似明人始爲復古之說非漢
唐人之詩則不敢以爲于古人固甚似矣而乃無以自見其
爲人是謂有古人而無我有古人而無我則惡貴其有詩也
宋之詩人如蘇子瞻黃魯直陸務觀今學者薄之以爲非古
矣然其詩具在其學問志節載之以出者讀其詩如見其人
讀其詩可知其世又安在其不古也蓋立言之道惡其不文
而無物而古今非有擇也蔭甫以細過去官未嘗少以爲慙
方且閉戶治經以績其學今讀其詩蔭甫之志可見也蔭甫
之時可知也而自謂其非古予謂此則所以爲古也予方有

四方之事恐不能復力於詩與蔭甫亦恐不能常相見而蔭甫之詩則固知其日進而可以爲古人矣咸豐八年十有一月書於嘉興舟中

項先生詩序

吾邑前輩諸先生之好學能文辭而與予相及者曰曹秋隱
孝廉方雪齋學博及我項氏舅雁湖處士凡山學博予少時
以詩文從曹先生游最久雪齋先生於其退歸時一見之居
湖凡山兩先生在鄉里常閉戶不通交游雖予亦未得見後
居京師乃屢見凡山先生而雁湖先生終未之見也予初自
京師歸方先生已卒曹先生亦老病及再自京師歸則曹先
生與我兩舅氏皆下世矣士不幸生海濱窮僻之鄉不獨瑰
奇絕特之人不能常見至於好學能文辭者往往亦不可得
幸而有之而天又若重困之不使久居於世如諸先生者良
可恨也予家居求諸先生之遺書獨秋槎雁湖兩先生有刻

本方先生書最多皆散亡凡山先生最篤學而所爲書獨未
成去歲之夏始得見我二舅氏茗垞先生之詩茗垞先生居
鄉里亦罕與人通默默閭巷間今年且七十亦衰病矣蓋好
學能文詞之人旣不常見而及見之者又往往不知其可愛
貴及其旣久而思之則又將有不得見之恨矣此不尤可惜
耶夫詩之於道淺也然予竊見能之者其志趣操行必稍異
於俗人且人旣爲詩則必能讀古人之書讀古人之書則必
有見於古人之志與事固有因是而自奮於道者矣此其所
以可貴也茗垞先生將自定其集屬予爲之序予惡足以知
詩而讀先生之詩輒嘆諸先生之不復見爲可恨也因爲序
而歸之鄉之人有讀先生詩者亦知其難得而可貴不則同

治元年秋七月

乾州楊氏族譜序代曾相國作

自魏晉以來譜牒之學重於天下一時士大夫好以氏族相矜尚而唐之興命相尤貴門第其後史臣撰述唐史至爲宰相世系之表顧獨怪自古將相並重而唐史詳於相獨略於將然太史公班固書於楚之項氏秦之王氏蒙氏漢之李氏金氏往往喜言其世誠以將相賢否關天下其勲業之施於一時必本於忠孝之教而瓌瑋雄傑之氣鍾毓於祖宗功德之積累者尤非偶然也唐至中葉以後相業之可紀者絕少而武臣猛將後先接踵然而郭子儀烏重允韓宏諸人猶能自言其系世而其廟祀之碑託於韓退之顏魯公之文字以傳其後武夫悍卒崛起草莽之間或畜義兒養子以瀆其宗

而郭崇韜至拜子儀之墓則不復知所自出矣人倫骨肉之誼壞薄至於如此則其於君臣上下之間豈復足以相恃唐衰而遂爲五季之亂豈獨天運使然殆亦人紀之窮哉今福建水師提督楊君岳斌乾州將家子自其封公將軍以武起家咸豐三年某起義旅於三湘君以水師將從克岳州漢陽武昌順流而東遂奪長江之險戰功爲最天子用君爲水師提督固古之所謂名將也君既自請於朝占藉善化而先世邱墓與族人之在乾州者懼久而忘之故自爲楊氏之譜記其所自出而自高祖以下用歐陽氏法各列爲圖而屬予以序之予謂楊君以異軍特起屹然爲東南之重至今且逾十年天下但慕其材武勇略而不知其嚴於祖宗族姓間

其用心固如此昔孔子以戰陣之勇爲孝而自古大將立功
當世其所以移孝爲忠者固又自有本也周宣王出師征伐
重光文武其時爲之將相者有方叔召虎仲山甫之倫而江
漢之詩曰自召祖命常武之詩曰南仲太祖古時功臣世家
名閥甚可念也 今天子方隆中興之業楊君廌揚江左
實爲虎臣光寵施於宗族佑啓及於子孫楊氏之譜方且推
衍盛大至於無窮尤非唐世烏重允韓宏之比而獨愧爲之
序者無以與於韓退之顏魯公之文辭也是爲序同治二年
三月

淮陽正氣錄序

嗚呼皖之禍可謂亟矣此其無辜而死者皆其鄰里鄉黨
人嗜好言語之相通交游踪跡之相及在先王時方爲之止
閭族黨睦姻任卹之教使之出入相友守望相助疾病困乏
相收相養而不教之民乃恃其暴桀橫行鄉里互相屠殺孤
人之子寡人之妻老弱轉溝壑壯者散四方流離顛沛以至
於死者不知幾千萬人矣嗚呼豈非可哀也哉然其頑暴無
法棄禮蔑義至於此極而一時民之激於義憤猶能捨不貲
之身決旦夕之命忍饑餓冒白刃以與賊抗而其農夫野老
婦人女子生未有師友之教目未睹聖賢之書當其逼迫困
窮之時其勢可以苟且自活而慷慨激發義不倖生或赴敵

以捐軀或罵賊而不屈至於轅裂支解誼不旋踵抑又何其難也此雖國家德澤洽於人人然亦可見人性之善雖綱紀法度蕩然盡失而禮義廉恥之在人心者固有時而不可遏也然則因其本心之明而導之以善亦何在不可以爲治而今之爲吏於皖者且以謂豺狼虺蜴之徒不復可語仁義欲一切以刀鋸從事豈知禍亂之成由於不教者固亦名爲人上之過也嗚呼其亦可謂不仁也哉同治三年春予以權廬鳳嶺道從中丞喬公治軍臨淮於是知鳳陽府事胡君玉坦上其所屬壽州鳳臺各死事者冊將以請卹於朝蓋自張樂行宮德張隆之變及苗沛霖之再叛壽州鳳臺之官若民死於賊者凡五千餘人可謂慘矣而其忼慨赴義備極毒虐以

其數百人則尤可閔者也廬鳳穎道所屬三府四州其
禍大約相類獨壽州鳳臺之人能以其事聞則其他之死
而遂至湮沒者不尤可哀也乎予既上其冊於大府復採取
其死之尤烈者別爲一編而爲序之如此既以表章仗節効
義之人以爲世勸而又以著人性之善雖當狹隘酷烈之餘
未嘗泯然盡喪而爲吏者慎無謂吾民之真不可教也且以
警夫皖民之習於亂者使知一時暴桀之徒如張樂行苗帥
霖等卒皆屠滅以死死而爲世誦辱曾狗彘之不如而民之
抗賊以死者雖極慘虐於一時而其事赫然昭於斯世其姓
名炳然列於史冊雖死而無異於生也然則皖之亂民其亦
何樂而爲賊也哉甲子六月書於臨淮軍中

丁松生書庫抱殘圖序

西湖文瀾閣向藏四庫賜書咸豐十年燬於粵賊又三年賊
乘杭州去錢唐丁君兄弟甫入城卽購收殘本得其十之三
四移虔郡學而爲圖自紀其事大帥某爲之名曰書庫抱殘
圖丁君復屬予爲文以記之予謂丁君曰唐安史之亂郭子
儀李光弼以諸道兵討賊克復兩京再造唐室功烈偉甚其
麾下爪牙往往起屠沽蠟將相天下之勢一變而趨於藩鎮
武夫悍卒偶然肆於人上以致亡唐而其禍遂延於五代迄
宋初而後止蓋自唐之衰人君漸不悅學而士大夫方競於
進士浮薄之習不復深求大道雖以陸贄韓愈李翱劉蕡之
賢不能少行其志至五季之亂則禮義靡蕩然盡矣此其

勢之所以一折而歸於藩鎮而武夫悍卒所以能禍天下哉今日粵賊之禍無異於安史然自湘鄉相國首以文學大儒倡義鄉里而胡文忠江忠烈羅忠節皆一時儒者左提右挈卒夷大難雖一時後先扳附類多汗馬之勞然每克復省會則守土官卽以興學爲事天子復下詔風厲之使求遺書刻經籍與學者更始雖杭州受禍最慘當時所謂貴人達官張皇戎馬日在褰旗斬纓之間而於丁君之菟羅散佚亦若有深喜焉蓋太史公所云識時務者耶然或謂董晉裴度辟用韓愈于頗以禮聘溫君二處士未嘗不崇用儒雅而卒無救於唐之衰豈勢之所趨固不可返耶抑虛聲浮慕彼固不足以知之耶要以明天子在上方以崇儒重道綱

國本而大夫憂危患難之餘孜孜向學如此此國家氣
運之隆所異於唐之季世者已而丁君此舉又能仰維
祖宗右文之澤首爲士林讀書之倡則其重尤可謂已
同治丁卯

瑞安北鄉團練義民表敘

咸豐十一年十一月六日瑞安並河諸鄉民既相約殺會匪城圍解而金谷山賊聚如故其餘黨分據江上流者萬餘二十五都之祇陀山統師記名道張啓煊以閩兵進逼之遣生員孫詒穀先行十六日詒穀燒祇陀寺啓煊進次程頭於是二十六七都諸從賊者皆反正啓煊遂謀直搗金谷山復令起團練以助軍於是廩生吳一勤以一都團丁詒穀以二十五都團丁皆從行十七日啓煊以舟師與一勤詒穀約分道進而一勤詒穀先行金谷賊首復脅二十六七都諸村并力爲抗拒爲設食以款官兵一勤詒穀至碧山而賊數千突至遂大敗一勤詒穀幾不免已而舟師至發巨礮擊之賊始潰

去凡團丁死者若干人今悉表之於左瑞安港鄉河鄉以禦
匪禦賊死者附於後

雷瀆團練義民表

金錢會匪起平陽錢倉錢倉汎外委朱鳴邦首入會益張賊勢脅縣令翟惟本惟本懼奸人某謀兩利招賊爲團練言之惟本惟本喜招匪首趙起等入署飲酒府檄高令往偵賊惟本復招趙起等來共飲酒因爲言之道府謂賊解而賊焚掠平陽鄉間益甚豎旗平陽城外逼平陽文武共祭旗平陽民謂官皆從賊益靡自錢倉以南瀕江諸鄉至北港南港及縣東諸鄉近瑞安者皆從賊獨雷瀆溫氏以大姓多壯丁誓不入會生員溫和鈞走瑞安治團學士孫鏘鳴願團練鏘鳴激厲遣之遂屢與賊戰雷瀆在錢倉肘腋賊畏且恨悉黨攻雷瀆和鈞求救惟本惟本曰趙起等我團練也不應賊遂焚雷

濱和鈞與其父儒業妻陳氏傭林時標同時死團丁死者數十人其弟生員溫 and 鏞獨挾數十人逸出會聞師帥秦如虎自福鼎張啓煊自處州皆來夾剿平瑞賊和鏞乃率溫氏團從官軍剿滅賊既而粵賊犯瑞安和鏞復從啓煊助剿先後陣亡若干人今悉表之於左平陽諸鄉以抗匪死者附於後

湖石團練義民表叙

金錢會匪既襲破郡城瑞安西北臨江諸鄉多從賊獨營前
以上北至大嶺南至公洋數十村落從義士張家珍團於湖
石謂之大港白布白布者學士孫鏘鳴治團時以布一方爲
團勇號衣而書曰安勝義團會匪惡之呼爲白布會其後凡
義民與賊戰賊皆謂之白布雖民間亦以團練爲白布也張
家珍權謫善戰與賊連戰凡十日未嘗傷一人家珍死其弟
崇新領之湖石民尤義家珍家珍死湖石團練出戰皆白衣
白旗幟戰尤力所殺會匪亦數千而團丁往往傷亡其後既
從張啓煊滅會匪而粵賊又自青田出白沙嶺犯瑞安啓煊
復調令助剿自咸豐十一年九月始團至明年五月粵賊敗

去始徹戰而死者若干人自張家珍周飛熊吳希璘外官不能卹也今悉表之於左瑞安大港中港鄉民以擊會匪粵匪死者附於後

塘後團練義民表敘

永嘉江湖西上九十里至溫溪止溫溪臨江岸居民數千人
販鹽爲業而悍強能槍棒火器咸豐八年粵賊陷處州將下
犯溫溪土民以小船伏灘下置鳥槍篷隙中擊賊賊驚走溫
州始無事由溫溪西北入山二十餘里深菁峻險過滿箬嶺
有村據山半曰塘後居民二百餘家以大姓凌山中人然仗
氣頗知太義同治元年正月粵賊已據青田溫溪民復謀擊
賊求官以兵助官不應溫溪民始散入山而塘後民與近山
各村自團山中賊遣青田奸民招之不從責獻粟米牛豕又
不從而賊於二月初三日由溫溪入山塘後民置礮滿箬嶺
賊至輒殲之賊恨甚悉銳攻塘後山中民聞賊礮卽鳴鑼皆

詣滿箬嶺連戰十日賊終不得上嶺十六日青田奸民導從紅巖頭人紅巖頭出塘後背守嶺者望見紅巖頭賊旗始大驚以潰而壯丁猶與賊鬪皆見殺賊怒盡燒其屋而去溫溪民避賊者亦死焉死者若干人今悉表之於左永嘉諸鄉以禦賊死者附於後

蔣氏莫如樓時文後序

今兵部侍郎廣東巡撫湘鄉蔣公爲浙藩時將刻其大父兄弟蔣氏四先生之文予友王定甫通政旣爲之序矣暇日以示予曰盍爲一言余旣受而卒業慨然曰異哉蔣先生之論文也其志可謂大矣豈逆知其後人將有經世大業爲國家建立非常之功者哉其稱述李文饒謂漢孝武以片言折武安衛將軍爲得其要而謂文饒自作諭三鎮詔開誠寫懷言簡而理盡論文宜識其意又謂趙括之不能讀父書爲不知合變廉頗拒秦長平正與馬服君同一機括而括不知以爲文亦不可無變嗚呼此豈時文家之言哉其志可謂大矣雖然先生豈遽言以欺世者哉夫時文國家之所以網羅人

材者也然自古取士之法雖漢唐以來未嘗不以文辭時文其尤雅者所發揮者四子之緒言所取材者三代之經籍所涵蓄而旁通者後世之賢奸得失而諸儒之名言輿論也自有明以來至本朝五百餘年名公鉅人未始不出於時文而歸熙甫唐應德金正希黃陶庵陳卧子之所爲文則讀其文可以知其爲有道忠亮之士蓋其積於理者深則發於行者必篤操於行者篤則著於言者必昌也近數十年時文之道漸敝不學而詭遇者始有速化之術揣摩聲病塗澤顏色以求合於有司有司者亦率其庸學淺識以繩尺夫士於是時文始可以不學而能矣旣以不學而得科第又以不學而得科第者居於民上是非羞惡之說旣無所動於其心成敗

得失之蹟又未嘗經於其目而資權宜以自陋其私則定矣梯脂韋如先生所云哉其任已縱慾以敗人家國者蓋不少矣嗚呼此豈時文之咎哉今四先生之爲文方有志於經世合變而其文之精深博大各具所長亦實有以異於所謂不學而爲時文者蓋將推求文辭之本以爲當世之用然四先生者惟星階先生得登甲榜餘皆以名孝廉終蓋未嘗一日有施於世也夫士之砥行立身者不得於身必得於其子孫而自古英雄俊傑之有功一時者其淵源常在先世中丞以布衣從軍轉戰湖湘嶺海蕩平浙東西汗馬之勤聞於天下及其屏藩吾浙當瘡痍水火之餘愛民下士奮發踔厲綱舉目從可謂有功於時矣然每與予言卽自以未學爲

恨夫今天下之得科第者一旦居於民上則儻然曰吾可以不學矣而中丞之言如此此其漸漬於先人之教而度量之過人何其遠哉四先生之文具在中丞誠有志於學以爲古今之大臣則卽其文以求其本夫亦曰讀書而已矣養氣而已矣讀書則理明養氣則愛憎喜怒之所發皆有以權於義理之至而不爲傾險佞諛之所欺則所謂善讀父書而能應世合變孰有加於中丞哉中丞方承 簡命開府廣東廣東之民無異於吾浙之民而中丞之權益專中丞之學當益進則其所以光大四先生者豈徒文辭而已哉然而四先生之文自此益遠矣同治五年夏四月

袁端敏公年譜序

成皇帝之季衣言居京師項城袁端敏公方爲御史有召及

顯皇帝初元衣言官翰林見公彈奏某郡王及侍

書元事尤以爲偉公之劾某郡王人頗爲之危卽

上意

亦以爲太甚非所宜言然猶抵某王以罰謫其尤顯白者數
人遂正朝廷之禮竊歎公固諒直亦遭其時然也未幾公出
督師安徽垂十年屢躡屢起而衣言亦出爲安慶守連遭患
難不得再瞻闕廷而公則旣卒矣今年春復以選人至京師
公子保恆以同年之好假館以居屬爲譜公之行事因得盡
讀公所爲內外章奏無慮數十巨冊則知公自官臺諫至爲
將帥卒以病歸前後十餘年自論軍中事外凡關於君德之

得失行政之是非用人之當否與同時大小臣工之忠奸邪
正無不極言以聞 天子或立爲變改或久而後行或留
申不發卒見採用而絕未嘗以愚直見罪戾乃益流涕太息
以謂公之能諫 二聖人之能受諫真一時之盛也夫
諫官之爲用自有書籍以來至於今數千年無不以爲朝廷
莫大之事存亡治亂之幾此固不待言矣而衣言竊以爲尤
繫於治亂存亡而不可一日已者莫甚於賢否舉劾而賢否
舉劾之在郡縣尤甚於朝廷朝廷之臣天子耳目之所及喜
怒之所加也至於郡縣其去天子近者數千里遠或萬里外
民之疾痛困苦不能自控於天子也則曰吾以告之郡縣吏
天子不能見我民也則曰吾以屬之郡縣吏天子恃郡縣百

姓恃郡縣而郡縣不足恃也則所恃以察郡縣者莫切於監司大臣而天下之監司大臣往往不憚於欺天子而莫不樂於庇郡縣吏郡縣吏知天子之遠而可欺監司大臣之近而可庇也則巧爲法以媚監司大臣而恣其意以虐民於是民始無所告而大亂作矣廣西淮壩之賊其始皆吾赤子也爲善不得伸爲惡無所懲而赤子乃化爲盜賊夫天子不能見百姓不能察郡縣而獨於深居九重之上可以明見萬里之外者賴有諫官而已則諫官者爲天子察監司大臣以察郡縣者也天子之耳目一人之耳目也諫官之耳目千萬人之耳目也以千萬人之耳目爲一人之耳目則亦孰得而蔽其明哉嗚呼孰謂天子而可以輕視諫官也哉端敏公遭遇

兩朝稱以自盡其言今之所見於章奏者如此豈獨公之忠

成皇帝

顯皇帝之深痛百姓而恐其無

告真聖人之用心也公獨何幸而適遇其時哉而與公同時諸公以直言聞如朱公琦陳公慶鏞王公茂蔭四五人者至於今猶令人歎慕爲不可及然則諸公者亦何幸而適遇其時哉故衣言於公之奏議凡有關於舉劾之大特備錄之其疏留中者則屬公子保恆載之家集以俟異日蓋衣言次公之行事而不能無世變之感矣公旣以直言聞其後乃能爲將帥爲國家并禦禍亂人尤以爲難衣言則謂此可於爲御史時決之也汲長孺事武帝武帝以爲讜及淮南衡山之謀以爲公孫丞相等如發蒙獨畏長孺而武帝亦以淮陽勁

兵處謂長孺可以臥治嗚呼仗節犯難之事豈可責之選與
取容者哉同治七年十月瓜州舟次

旌表烈婦錄序

同治二年予依湘鄉先生安慶軍中績溪程生光國觀甫不
避寇來安慶與弟二人奉父以居觀甫年少誠篤向學甚
湘鄉先生所喜觀甫故來就予學已而予攝廬鳳兵備去安
慶旋以太淑人憂歸與觀甫不相聞者五年去年冬來官金
陵舊時皖中友往往在詢以觀甫則歿已數年獨其父尙無
恙年已邁而觀甫諸子皆幼穉予甚爲觀甫悲繼復遇歙汪
君士珍爲予言觀甫仲弟某季弟光輔皆先後卒而光輔婦
胡氏殉夫事甚烈初光輔以父命賈上海及觀甫兄弟卒父
令復爲儒甫補縣學生復以病卒胡氏絕粒七日以徇之年
甫二十一湘鄉先生旣爲請旌於朝一時士大夫復競爲詩

文以美其事此錄所載是也予謂烈婦深痛其夫而不肯少
愛其生如此然人亦孰不愛其生而私厚其生者至於犯禮
義蔑廉恥以爲之則自褻其生亦甚矣如烈婦者豈可謂不
愛其生也哉人之有生其幸無過於富貴壽考而百年之久
殆如過客至於烈婦之節乃欲與日月爭光亙千古而不敝
此固可爲程氏父子慰者也汪君又言績溪烈婦馮氏者馮
明倫女文童石承萬妻承萬禦賊受傷死馮氏亦不食死死
之日異香滿其室其事與烈婦絕相類馮氏之死先烈婦數
年而與烈婦適同縣然則天地清正純淑之氣其鍾於婦人
女子乃獨多也歟烈婦監生胡雲衢女光輔字纘之其父名
汝均己巳正月鍾山草堂

介庵文集序

同治丙寅衣言在杭州既爲磬庵張先生銘墓而先生之子某復以先生所爲介庵文集見寄求爲之序予爲訂定其可否復詳論其辭義之美以示鄉之後進且曰由先生之所作而深求之則將漸致於韓歐陽李杜氏無不可也此豈妄言也哉蓋衣言於先生之文盡心焉爾矣竊嘗論吾鄉儒術之盛無過於南宋乾涓之際而其文章尤美者曰水心葉氏止齋陳氏止齋之學最深於經而其發之爲文則子長永叔之流也水心之學最深於史而其發之爲文則賈生蘇氏之流也二先生之書今猶具在吾鄉之人能讀二先生之書者豈矣讀其書而知其意者尤尠矣至於由止齋而知可以爲子

長永叔由水心而知可以爲賈生二蘇又豈可人人而語之哉蓋鄉曲之士習於所見驟語之以韓歐陽李杜氏未免畏其難也引之以止齋水心之爲學將有欣然從之者矣驟語之以水心止齋猶未免畏其難也引之以近時作者如先生之爲文則必有奮起追之者矣夫文章之妙具於人心而其精深變化之故皆可以學而能也遠望數百載以前而以爲不可幾及幸而得生鄉里之間則又以其近而忽之是亦不學而已矣故予於先生之詩尤盡心焉而復申其說以爲之序使鄉之人取先生之文讀之而知其可以漸致於韓歐陽李杜則乾瀆諸儒之盛其將可以復見乎是在勉之而已先生淡於榮利生平獨嗜讀書故其所詣之精如此其愿官行

義則已具於銘幽之文矣茲不具書庚午七月書於金陵

焦尾閣詩序

焦尾閣詩一卷予友黃巖王禹堂渠城母廬恭人之所爲也渠城旣輯其母之詩以求予序而復述其母之遺行以列其思母之意其辭甚悲予不忍卒讀也蓋自粵寇之亂黃巖旣爲賊陷渠城父母奉其大母轉徙避寇流離奔走不遑安處者幾一年及寇去得返而恭人不久卽病渠城方以試事出比歸則孺人已卒此其所以悲也然渠城雖以應試不能日侍母疾致有終天之痛而渠城之出實母命之行其母之始病渠城固尙在左右及其卒也渠城近在杭州父召之卽反母卒未一月也渠城少小篤學爲名諸生登賢書爲名孝廉凡母之所以屬望於渠城者渠城皆有以慰之渠城固不勝

其悲而在母固可以無憾也吾家之被寇先大夫與丁太淑人倉皇出避其事與渠城父母無異而予兄弟之再出太淑人實不樂其行及太淑人有疾予方在鳳陽予弟方在京師太淑人病且小予兄弟猶不得知及聞太淑人之喪數千里匍匐以歸而太淑人已就殯矣嗚呼此其遠去父母之罪上通于天視渠城何如也予母初未嘗以仕宦望予兄弟及其病也又甚望予兄弟之歸而不得則予之無以慰母心者視渠城又何如也渠城痛母之切以謂天下之悲無有過於渠城者而豈知予兄弟之所遭其可悲又有甚焉者乎渠城敦行好學方且取甲第顯名業以大慰其母之望又能編輯遺詩以寄其杯棬手澤之感而顧命予以一言而豈知天下豈

有無母之人哉亦聊以塞渠城之請而已矣盧恭人孝廉以
孫處士肅炆女警敏通書史而性尤孝其父之疾嘗割臂肉
以愈之及歸王氏順於翁姑和於妯娌視諸子如子皆婦人
所難能也其生以嘉慶庚辰卒以同治乙丑年僅四十有六
云同治辛未正月治城山莊

王梅庵先生遺集序

同治三年正月予自壽州旋里過金華遇學使者吳和甫前輩極稱黃巖王子莊之賢予心識之又二年予在杭州書院子莊以鄉試來杭與予同居喜其儒雅溫粹以謂雖其爲學之勤而淵源所漸蓋必有得於父兄師友之益子莊在書院孳孳誦讀間則手抄其先人遺訓六篇爲梅庵先生集予取而讀之則皆菽粟布帛之言未嘗稍爲高談詭論而鑒切人心令人往復循誦不能自已然後知子莊學行之美其淵源固有在也先生修身績學雖以老諸生終而年登上壽鄉里崇敬推爲祭酒子莊又善讀父書謹守先生之訓以自淑其身凡先生所謂立品讀書取友之道皆庶幾篤信而允蹈之

既以優行充貢旋登丁卯賢書其所以顯親揚名將益光大
盛美先生可謂善教其子子莊可謂無忝所生矣今夫松柏
杞梓豫章梗枏千章之木百仞之幹蔽風雨而干雲霄者其
所產之地必在大山窮谷水土之所聚陰陽之所會苟非其
地則不能生美材而斧斤牛羊之害滋培壅護之功之恃乎
人者無以繼之則亦無以成其美矣子莊仰承家學備有淵
源可謂篤生之慶而所以滋培壅護之方則卽此一卷之書
有終身行之而不能盡者是在子莊之自爲矣昔南宋之季
黃巖諸先輩儒術甚盛南湖杜先生兄弟師事朱子而其後
有清獻之相業車敬齋隱居講學其子隘軒兄弟繼之至玉
峰雙峰而其道益光當時儒學名門後先承接之美令人心

嚮往之以子莊之賢而又能恪守先生之遺書充而大之
復乎南宋諸儒之盛軌則後世論黃巖王氏之學推厥本
必以謂自先生發之矣同治辛未

黃禮部詩序

予在上書房時所居澄懷園廬當塗黃勤敏公直南齋時
居之有小竹一叢猶公手植所謂食筍齋者也勤敏工文辭
善畫而所爲詩曰壹齋集予尤喜之以爲予瞻不能遠過旣
得居勤敏舊廬乃請於壽陽祁文端公重書齋額揭之便坐
以示仰慕勤敏之意予旣出守安慶又十年同治戊辰來官
金陵勤敏之孫安謹子慎亦以知縣待次適在江南見予詩
有及食筍齋者亟介予友南匯張文虎嘯山索予詩以去已
而復以壹齋集見寄又以其尊甫小田禮部集屬爲之序以
予與黃氏有文字契也小田之名屢見壹齋集中顧絕未嘗
見其詩今旣得盡讀其所爲過庭誓墓遊弋萍軒諸集則知

勤敏視子瞻固無媿而禮部殆過叔黨於是益歎黃氏仍世父子文章儒雅殊不可及予在書房時兩齋翰林十數輩往往以文學意氣自相矜尚然每念勤敏當日卽歎前輩風流不可復見而是時祁文端公猶居京師時時相從飲酒談藝每喜言勤敏時事予竊謂見文端如見勤敏也及予以出守去後數年文端公旋卒則所謂如見勤敏者亦不可復得矣今讀禮部詩尤喜其似勤敏以平生仰慕勤敏之意見禮部之詩亦如見勤敏而詢諸嘯山則禮部之卒亦十餘年矣嗚呼歲月疾速如此才人壯士欲其常留於世固不可得而流風遺韻所存往往相去數十年輒渺然若不可及此殆非人之所能爲歟禮部之詩才力不逮勤敏而精新要眇獨有所

得蓋非流俗之所能爲它日當與壹齋集並爲世所貴重而
文端公卒後其所爲襍欲亭集今亦大行於世然則勤敏父
子雖不可作而其文章之可以自見固且愈久而愈光卽予
之所歎爲不可復見者亦自有其不可亡者也獨念平生仰
慕勤敏旣不相及幸得從文端公游以求其淵源相爲承接
之故而今日之念文端乃無異於昔日之念勤敏也此則覽
讀禮部之詩而不能無概於心者矣同治壬申十一月二十
七日書於金陵思食荀齋

江南武鄉試錄後序

同治庚午江南武科臣以內提調分校東園既畢後警署
恭進試錄因得綴言其後曰臣不才幸用文學致身夫位
出智慮謨議朝廷猥以素所未學從號暴之間求將帥之選
誠未足以知之然竊見國家定制騎射取士程以膂力美哉
聖人之法百王之所不能易矣趙武靈變服取樓煩林
胡漢武定滇亦鑿昆明習水戰因時便利有宜有不宜且漢
與匈奴同居西北廣野而當時謀臣以謂外國長技三中國
長技五人各有能有不能不以相強衛青驃騎掃穴犁庭立
功萬里之外彼所用者獨非漢之利兵耶畢昴之間天爲之
限中國神明所居人民稟五行之正聰明才力超絕異類摩

厲爲用視乎其人兵家者言奇正無常要之勿誘於敵世衰
道澆機智日出險毒愈甚然皆微幸一時非所謂長策勝算
而淺夫耳食方藉口於武靈昆明之事烏足以知
宗聖人之微意乎
天子神武中興必有遠略大度之士
爲之折衝禦侮庶得其人
臣雖疏遠尙欲得而議之江蘇候
補道臣孫衣言謹序

胡月樵退補齋詩存序

予與月樵不相聞將十年去歲秋間月樵自鄂州以新刻詩一卷見寄又以所爲近詩四巨編索予序予始知月樵今年月樵以省其故人何侍郎來金陵就予館輒連日夜論詩不倦復出所爲樂府古詩數十篇則知月樵爲詩已久詩又多且工予始與月樵相見在咸豐乙卯之夏時月樵方以駕部郎居京師好客喜造請士大夫官京朝往往多月樵相識月樵日從諸公貴人歌呼飲酒門外車常滿尤強力喜事遇事愈劇愈心開諸貴人或有賓祭期集卽以屬月樵月樵咄嗟立辦予特謂月樵年壯氣盛它日當爲能吏有才而不謂作詩之善如此蓋月樵自與予別益折節讀書及至武昌

與何伯英張鹿仙諸君友善繼復識閩林穎叔乃益顓力爲詩詩遂益工予益歎月樵善自變化而前之知月樵未足以得月樵之深也然予見古之所謂詩人大抵山澤之癯顓顓顓壹之士否則逸情曠志翛然勢利之外者也予自去京師後每爲詩輒恨不自得月樵雖才力過予然方簿書鞅掌逐逐人事亦安能恣肆適已以自快所好於文字之間乎予與月樵皆居浙東千里外而永康在金華萬山之巔古之所謂洞天福地仙人黃初平之所游予每度括嶺望仙都求軒轅鼎湖之遺見其雲山窅遠竹樹深蔚溪壑交流映帶若隱若顯出於蒼翠叢灌之間輒低徊不能自己月樵其亦慨然念之乎它日飄然東歸凌濤江沂湍瀨求月樵於華溪龍窟之

間相與攜酒螭屐登高窺幽訪昔時高人逸士如嚴光海
真其人者以與之游月樵之詩且益進而不可及也同治
申十一月

琉球入學見聞錄序

疏曰 國初以來子弟入監讀書者七乾隆間教習_臣潘
祖始爲入學見聞錄一書所載 朝廷恩數及其國世系風
土人物文字言之綦詳嘉慶間教習_臣黃景福復爲見聞辨
異一卷攷訂訛誤皆足與徐葆光周煌諸志互爲質証道光
二十一年琉球弟子向克秀阮宣詔鄭學楷東國興四人入
監_臣以副貢生充教習時與諸弟子詢考諺俗大約無異前
錄而其在學所爲詩文別爲錄刻故不復著論今年二月_臣
以提刑淮南北奉 命入覲適琉球弟子林世功學成將歸
來謁於客邸世功在其國時嘗從宣詔國興學故脩再傳弟
子之禮隨教習_臣徐幹來見而幹復以所輯見聞補錄屬爲

之序猗與盛哉我國家聲教覃覃無遠弗格而海外藩邦
能以禮義文學接於上國其子弟又能循習儒雅知中國
所謂師弟子之禮皆爲可紀昔子思之書推言聖人教化之
盛至於舟車所至人力所通日月所照霜露所墜凡有血氣
者莫不尊親蓋其盛德沾被非疆域所能限隔而四荒絕域
言語之不通文字之不同乃有事祇神逞怪誕以自絕於聖
人者夫聖人之教所弗及則亦非帝王之權所能治矣然聖
竊見載籍以來如漢之冒頓晉之劉石唐之吐蕃回鶻皆能
騁其凶鷙爲禍中國而其棄禮蔑義自相傾奪以取滅亡大
率遠者百年近者數十載輒種類絕滅歸於烏有殆與草木
禽獸無擇而琉球以海外小邦被服冠帶誦法詩書爲中

國儒者所紀比於春秋鄒魯豈獨天子文治之美亦其
涵濡聖教者深也是固宜保守藩服遠有歷年者矣故臣於
幹之所編樂爲之言而獨惜夫言語之不通文字之不同者
未能使之與讀是書也

琉球詩錄序

中山人士往往能爲詩然多爲五七言律絕以資酬答而已鮮有爲古詩者予爲教習時頗令弟子輩汎覽漢魏唐人以來諸家作者間語以古人作詩格法蹊徑皆洒然有得其所爲詩亦往往可觀予嘗擇其雅者錄而刻之謂之琉球詩錄今年春琉球學生林世功在監期滿其師教習徐君幹亦有詩錄之刻取而閱之則皆馴雅可誦而林生又來乞余擬學齋詩謂將歸詒國人徐君又言琉球人極重予前錄幾於家有其書其好文而勤學皆可尙也 聖天子在上方以文章禮樂陶冶天下俾各安其性命之正而荒洲窮島徃榛蒙昧之民猶有奮其角牙含沙噓毒自外王化者而琉球禮義

相承三四百載士之北學中國者獨能以揚扈風雅自託於
中朝俊秀之倫殆所謂蓬萊方丈秦皇漢武之所望而不
見者歟於戲盛矣

琉球詩課序

教習徐君既選琉球弟子之詩以爲詩錄又取所作帖體詩別爲一編而刻之太抵仿予前刻意也予謂試律之作始於唐人至今日而朝廷儒臣碩望下至山陬海隅鄉曲之士無不揣摩聲病如紅儷白以求合於應試之體而海外文物之邦如琉球者初未嘗有場屋取士之法乃亦效而爲之信乎風尚之所趨有莫知其所以然者矣予嘗聞中山人士雖尙試律然其國人所爲大率四韻而已阮宣詔等入監讀書始有八韻之作而徐君此錄所載林生詩尤爲妥帖詳雅有中朝館閣氣象則其文教之開而日新尤可喜也昔宋人言詞科之做一時競爲儷偶至有以一聯之佳終身富貴者

今殿廷考試皆用八韻而館閣之士畢精壹志以求工於聲韻對偶其弊殆亦類此獨琉球幸而無之則其所謂試律或猶近於古詩之流也歟徐君其必有以取之矣

林恒軒詩序

甲戌

予年十八九在邑校從城中曹先生秋槎游學爲時文其時
樂清林君大椿恒軒亦來從先生學曹先生雖以時文名然
兼治古文辭故予與恒軒亦時從先生學詩恒軒年稍長於
予貌癯而氣樸見人輒開默無言在邑中尤不輕與人交雖
予亦不能時相見往復論議其後予至樂清一訪恒軒始得
見恒軒所爲詩予甚喜其五言古詩質實有義理以爲可傳
後又十餘年自京師歸復見恒軒於郡城出示其詩詩益進
而竊歎恒軒須髮半白矣其後予官京師久恒軒不幸遂卒
前年予在金陵仲弟書來言恒軒詩已得其門弟子刻之獨
俟得兄序以事多人不得爲而我弟趣爲序不已蓋予最知

恒軒子誠不可無言也恒軒善事父母居鄉恂恂篤謹常終
歲閉門教授不輕出獨喜讀書著文於諸儒書及天官厯算
家言皆能研精覃思而書皆未成獨其詩可以示世連應鄉
舉卽不中以廩生入貢國子以卒又無子以從子爲主後
蓋天之嗇於恒軒如此然其修身篤學卒有可見於後世則
恒軒之所以自厚者天亦未能與也恒軒可謂無憾矣昔水
心先生記樂清王忠文公及孝廉錢公司理賈公之祠以謂
天下獨知樂清有王公而邑人以爲此二公者亦我地之所
有也而三賢之名遂至於今未嘗以窮達有所先後今樂清
之士得名位以才德自見者蓋鮮然使鄉曲之間果有如熙
載元範其人者人亦豈得以無忠文之名位少之哉恒軒蓋

知之矣吾鄉諸儒莫盛於南宋而予尤慕薛文憲陳文節之
爲學喜讀其書時時訪求其軼事每見後生秀士卽欲導以
永嘉之學然苦無有應者夫永嘉之學之盛豈有它術哉使
郡邑間皆得如恒軒者一二十人其爲乾淳之盛無難耳獨
無如知此者鮮也則於恒軒之詩其烏能無言也哉同治甲
戌二月二十四日在安慶序

李芝農詩序

廬州李太守炳濤以其尊甫芝農先生遺詩一冊見示屬爲之序。前几案間幾二年簿書叢牒久之未有以報憶予初識君在道光戊戌己亥間君時爲太醫院屬官太醫堂上官僅五品所屬有首領御醫八九品吏目無慮四五十人皆北方里巷子無一士人亦不知其何由得官自吏目以上踐更直內廷稍遷至御醫卽爲天子主方矣事任綦重而其選顧輕不知何謂也芝農獨通儒家言善唐宋人書法其爲詩尤善也芝農在京師年已六十餘官卑祿入薄然甚自重資醫以贍妻子義取外不妄有求所居在琉璃廠東小巷僅通車予兄弟京居善病時時詣君求療泊破屋數間排門入殘

書舊帙堆疊錯亂兩稚子同案讀書聲琅琅然其幼者今廬州太守也予在京師時未知君能爲詩君既卒予亦出官於外無由得君家子弟狀及來金陵太守以書來自言家世乃大喜故人有子比來安慶與太守時時相見遂獲盡讀其詩詩先有予弟止庵序謂君以善醫稱所活人千百數必有所論述成一家言其有用於世十倍於詩當益蒐輯勿令君之徒以詩傳子弟之言是也然觀此數十百篇則固可以傳君矣太守起家縣令歷蒙城亳州攝鳳陽府以特旨擢守廬州官日起有聲所至以鋤奸去弊清理獄訟爲先而不以毫髮妄取於民志趣與流俗異甚皖之民畏而愛之予每與人言好官輒以太守爲稱最於此又以知君家法然則所以傳

君真不徒恃此數十百篇矣是尤可喜也光緒元年冬十二月瑞安孫衣言書於安慶

焦雪山房詩序

昭文王大令愷少溪嘉慶初以進士爲令我浙宣平後又爲廣東澄邁皆以廉平稱令宣平時嘗分校浙闈我邑前輩觀察林公實出其門觀察守重慶川督蔣相國攸錫以吏治第一薦後備兵大名相國督畿輔又薦之今觀大令行述其爲澄邁時相國實撫粵東特爲賞異則師弟子文學政事淵源固有自矣觀察孫蒙城令君用光若衣比居予官舍大令之孫宗城適來皖以通家世好來視若衣出大令所爲詩一冊屬予爲序予謂大令以名進士爲循良吏惠澤在民不必以詩傳而詩又和雅可誦宜宗城之護惜之也寇亂以來故家世族淪喪多矣其殘編斷簡付之灰燼者尤不勝其多也觀

察遺文有寶香山館集若衣緘滕置篋中數十年南北奔走
未嘗頃刻捨去閒出展閱紙墨如新宗城飢驅遠游家無長
物獨抱此編唯謹皆可謂賢子孫然則廉吏可爲其遺澤所
詒亦有相似者耶觀察集久未鋟板若衣力尙能爲而宗城
年壯有志二君子文字之傳其終當有賴也哉光緒元年除
夜大雪瑞安孫衣言書

廣濟耆舊集序

廣濟夏徵君槐旣舉丙子鄉試以予與科舉提調循俗脩弟子禮來見旣復出所輯廣濟耆舊集十二卷求爲之序蓋取其邑之能爲詩者自明嘉靖以來凡數十家得詩千餘篇都爲一集以寓表章先達之意於戲徵君之爲是書用心可謂善矣趙文子與叔譽觀於九原曰死者如可作也我則爲隨武子古之君子嚴於其國之先賢如此此豈有私於其閒哉仁人莊士流風遺澤之所存其可傳於後世者誠足繫人思也禮言凡釋奠者必有合有國故則否說者以爲國故若唐虞有夔伯夷周有周公魯有孔子則士之自立於已而有傳於後固非易言而又豈可忽也哉予平生喜言鄉邑軼事每

讀史策及諸家文字凡有涉於我鄉先生雖單詞瑣事必錄而存之既刻林直閣竹軒雜著許右丞橫塘集葉文定水心別集劉忠肅蒙川集復手校陳文節止齋集葉文定水心前集欲有以廣其傳今讀徵君此書於我心尤戚戚焉廣濟在蘄黃閒蓋一小縣唐宋以來名卿巨儒鮮有著者至明中葉作者始盛集中所載如王大謨惟尹之恬退吳亮嗣明仲之譚直楊大鼇用極之高義見於志乘者殊可慕也 國朝之初饒定中楊大勲吳兆崙輩不忘故君隱居遯世大節凜然而金會公以巍科績學蔚爲州部之望同時劉千里張長人諸人雖名位不顯而文章著述獲登 祕府與康谷子冠山人後先輝映蓋皆可謂天下之士而風聲所樹實在一鄉承

學之士誠能興起而慕效之師友淵源班班可考亦何必求
之四海之博千載之遠哉徵君好學能文方爲鄉里推舉如
漢之所謂郡國廉孝者其來見予造於便坐靜深而寡言溫
雅而有體實又足以稱也今觀此書罔羅放失表章遺佚其
留心邑之文獻旣如此則修身厲品厚自樹立必當求無媿
於諸先生者使異時廣濟之士言其國故亦將有取於徵君
是豈徒區區文詞之美而已哉光緒丁丑仲春瑞安孫衣言
序

永嘉先生時文序

吾鄉南宋時學者極盛而當時科舉之文亦推東甌婺越鄉先生中如陳文節之待遇集葉文定之進卷及八面鋒奧論論祖等作皆所謂場屋文字一時謂之永嘉體文節尤工省題初以春秋應舉後以弟子蔡文懿春秋學大進卽改占詩賦遂與文懿同時登第師弟子雄視場屋孫奕葉紹翁陳振孫輩皆喜言其事三先生名臣巨儒其亡箸述絕出異甚而於所謂時文乃亦致精如此明以來以四書義取士則四書義卽時文也其時劉元受方伯項甌東參政父子最工時文參政集有義則一卷項思堯之時文歸熙甫至爲之序而明時吾鄉人物亦甲浙中蓋士旣託身場屋卽不能不求工場

屋之文以蘄有合理固當爾而下州僻縣數十年不出一人者必其時文先無足觀然則時文烏可忽耶今日鄉曲之士狃於固陋既不知爲古人之學至於場屋之文乃亦鹵莽滅裂而科名爲之替矣然二百年來我猶得工時文者二人焉曰艾園谷先生誠敬軒孫先生希旦艾園之文多精微要眇之思而務出之以透達敬軒之文多俊傑廉悍之作而實蓄之於雄深同時文家才氣之盛詞華之富有過之者至於格律氣韻皆遠不逮此非予一人之私言也敬軒先生篤信程朱生平遂於三禮艾園先生隱居奉母自守介甚郡守長不得一見其面晚年喜讀荀卿王仲淹書其學皆有根本而於時文又嘗盡心力而爲之故非人所能及二先生者使其生

於乾醕之盛其遂不能爲文節文定諸公也哉近日吾鄉之士因陋就簡旣不能精於場屋之文以取世之所謂科第仕宦習於聞見之隘以成其志趣之卑語以南宋諸儒幾不知爲何人進以止齋水心之文章則以爲如天之不可階而升也嗚呼豈非自棄也哉昔呂成公教人常欲因時文以導之於學而南宋永嘉學者吾鄉之大師也予于鄉黨後進嘗欲因文節文定之文以進之於文節文定之所以爲學又欲因文節文定之時文以進之於文節文定之所以爲文而竊謂如谷先生孫先生之時文又所以導之於文節文定之所以爲時文者也旣得二家遺稿因爲合而刻之命之曰永嘉先生時文使吾鄉之士知有永嘉文體雖在風流歇絕之時未

嘗無篤志復古之士而苟能有古人之志卽未嘗不可爲古人之學則乾醕墜緒固可以復振也予雖老矣尙庶幾再見其盛也歟光緒丁丑四月湖北布政使新調江寧布政使郡後學孫衣言序